

四庫全書

集部

欽定四庫全書

盤洲文集卷十一

宋 洪适 撰

內制一

緣邊殘破州軍德音

隆興元年

朕惕奉慈謀務行仁政懼赤子之蒙禍敢起爭端會鄰國之厭兵弗渝和好比遣王抃遠抵賴濱得其要領而歸靡有毛釐之隱尋澶淵盟誓之信倣大遼書題之儀

正皇帝之稱為叔姪之國歲幣減十萬之數地界如紹興之時憐彼此之無辜約叛亡之不遣可使歸正之士咸起寧居之心魏杞使車已越疆而通問淮南侵騎皆空壁以退師重念數州之民罹此一時之難棟宇或遭於煨燼田疇併喪其犂鉏老穉有蕩析之哉丁壯有係累之苦三冬匱薄千里繹騷顧爾何辜皆予不德宜推洗滌之宥少慰凋殘之情入赦文於戲歌鴻雁之詩期冀桑麻之業息貔貅之戍俾無金革之聲尚冀循良之臣

共敷汪濊之澤用陶協氣復見樂郊咨爾羣黎體予至意

郊祀大禮御札

勅内外文武百寮等朕受太上之燕詒宅域中之廣大將迎景至初款圜丘念報本反始匪尚乎虛文而交神塞明在顯乎誠意稽皇祖之詔令敕攸司而討論凡粢盛祭典則不改故常若鹵簿賜式則俱從省約行潦潢汙之可薦斯舉邦彛駢駒鸞路之勿修敢勞民力庶函

蒙於繁祉以大庇於黎元豐年無患於蟲蝗斥堠不驚
於燧火遂成熙事用答鴻休大號是盼先期追戒朕以
今年十一月二十九日謁款於南郊咨爾有司各揚厥
職相予肆祀罔或不恭故茲札示想宜知悉

郊祀大禮赦文

門下朕仰受燕謀獲承洪業刺六經之王制監百代之
禮文治壇燎以祭天警邊氛而遷日蓋昌陵始避於近
晦在太宗嘗改而用辛誠意動而二儀通孝道專而九

廟格致鄰國有休兵之好實上穹開悔禍之期前事俱捐弗念乎薄物細故烝民咸乂靡分乎爾界此疆五辰循宣夜之躔三白示豐年之兆進玉卮而界親壽爰創縟儀偕椒屋以慶母慈有光徽躅祇荷博臨之況敢忘昭報之虔啟蟄而郊飭周人藁秸之具奉牲以告協漢世竹宮之時式履孟陬之端遂逢先甲之吉靈心可卜帝武是繩乃裒四極之驩用潔一純之薦款閤宮而朝獻假太室以裸將酌沿襲不同之宜取齊戒自新之旨

瑄壁鎮桌權火配蔡高旂滇滇臚所求美光旁燭百官
濟濟敬厥事熙典備成載惟我宋之肇裡迺當乾德之
盛際法皇祖紀元之義采義文行健之辭誕易嘉名以
寧大器宜推作解之宥益廣好生之仁可大赦天下其
隆興三年改為乾道元年於戲逆三神之釐既橫流於
春澤接千歲之統期丕顯於文謨尚賴臣隣協恭小大
服采同濟更張之治用承洎選之休

郊祀前二日朝獻景靈宮聖祖冊文

伏以丕顯聖德垂光在天源深流長基命積累肆予微
眇獲保宗廟神丘備物亶惟其時沈沈閭庭靈旂所御
其香始升克綽永福

前一日朝饗太廟帝后冊文

伏以天祚炎圖聖聖繼武威盛德必百世祀是之謂流光
施及菲涼嗣無疆大厯服爰熙紫壇初交於神先事一
日入太室裸駿奔濟濟列陳嘉籩假哉皇祖啟佑我後
人永緝熙于純嘏

別廟冊文

伏以曄曄管彤卓卓坤極綏予孝子服堯之服上辛改
卜禮神頌祇絜粢廣牡既右饗之兆蒙祉福天下乂安
郊祀昊天上帝冊文

伏以惟泰元尊丕冒下土旋轉三辰闔闢陰陽元功無
垠蕩乎難名粵惟冲眇繼天為子仰憲聰明求端謹始
茲執犧牡圭幣肇禋于郊籩簋非馨於薦誠慤高高降
監是饗是宜事親保民惟皇其右之謹以玉帛犧齊粢

盛庶品涓選休成肅若舊典

皇地祇冊文

伏以至哉坤元穉穉柔祇播生品彙配天其澤惟冲人不德傳國于慈父用辛之吉禮行於郊宴娛安鷄粵其敢不察時和歲豐皇建有極用永受於蕃釐

太祖皇帝冊文

伏以五季搶攘遠邇如沸實天生德經武緯文滅除凶災用肇造我區夏燕及曾孫獲繩祖武崇崇其壇陟配

上帝庶幾臨饗克昌厥後

太宗皇帝冊文

伏以天造草昧聖武布昭席捲畔援卒其伐功傳序無疆于今九葉恭承禋祀瑄玉升壇烈祖烝哉克配彼天於萬斯年介以繁祉

立皇太子冊文

維乾道元年歲次乙酉月朔日皇帝若曰在昔帝王稽夏商家天下春秋之法立嫡以長主器繼明蓋取諸震

離所以尊宗廟重社稷也咨爾皇子少保永興軍節度使鄧王食邑二千戶食實封八百戶愔生有異表序居上嗣敦厚溫文金昭玉裕問寢視膳則盡綵衣之孝親師就傅則樂聖人之道令德逐日以新英聲隨風而流元良正本久矣僉望朕服堯之服兢兢四載仰奉慈訓肇闢春闈協華復旦日宣重光懿哉鑠乎有國有家之慶也是用撰嘉辰御路朝盛儀備物迎休于乾坤冊命爾為皇太子於戲悉爾心修爾身勿蹈非彝勿通邪佞

惟誠可以格物惟仁可以濟衆正言正道聞斯行之敬之哉用永我祖宗之丕命

除張浚少師保信軍節度使判福州依前魏國

公加食邑實封制

門下宅百揆而督五兵正賴籌邊之效冠三孤而張六
纛曲隆制閫之權我有明綬颺于拱著具官某材尊王
佐道聳民瞻節操堅剛曾歲寒之不改規撫遠大寧日
仄而遂休蚤逢陽九之交上應魁三之象叱王尊之馭

巨井絡以蜚聲下楊僕之船空潢池而掃祲更險夷而
一致謂文武之兼資粵從綠野之游殆為蒼生而起肆
予嗣服即俾來朝提江淮表裏之封盡顯總統佩將相
安危之寄式重倚毗三年于茲庶績用乂蒐乘補卒亦
既輸勞增陴浚隍未嘗徹警孟明報彭衙之役獨負壯
猶武侯引街亭之愆靡形慍色朕念疆陞之久戍詔師
衆以代更分遣從臣往宣使指棘門如兒戲耳庸謹秋
防袞衣以公歸兮庶聞辰告疊覽指瑕之効且披請老

之章欲畀舊官蓋無故事是用出楓宸之異渥超棘位之巍班盪節有光擇合肥之名鎮甘棠弗翦臨長樂之价藩衍以圭腴侈其真食於戲春秋責備於賢者慨功業之惟艱天子加禮於大臣固始終之不替其綏吉履毋有遐心

除湯思退都督江淮東西路建康府鎮江府江陰軍江池州屯駐軍馬依前特進尚書左僕射同中書門下平章事兼樞密使岐國公加食邑

實封制

門下位上宰而通四海久成調鼎之功開幕府以督諸
軍有賴止戈之畧參考古今之制獨顯內外之權式倚
宗臣用凝丕烈剛辰允協顯冊具宣具官某學博而識
明器宏而用遠稟五行之間氣蓋彪外而弼中冠四輔
於兩朝實光前而絕後主盟公道杜塞倖門業可侔於
臯夔言必稱於堯舜當羣疑之未定每潛畫而有餘事
不一書既鏗鉤於竹帛智惟千慮迨契合於著龜聿高

憂國之風遑恤盈庭之咎樞機周密猶神爵五鳳之時
廟堂雍容增大呂九鼎之重臻茲殊效本自至誠朕獲
纘皇基常懷戎事顧邊塵之未靖方議尋戈總兵柄而
非輕孰能和衆若時英衮正幹洪鈞文武為憲萬邦真
有兼資之美精神折衝千里當收無競之勲蔽自予衷
諧乎人欲俾仍提於相印往盡護於師干煥泰階三台
之躔益隆瞻仰枯尺籍伍符之數咸聽指麾自然增氣
於貔貅何特知名於草木乃陪井戶併衍原田於戲兵

事節度皆付公吾豈從於中御天下平治誰舍我爾盍
勵於遠猶緬惟真儒寧煩多訓

除楊存中都督江淮東西路建康鎮江府江陰
軍江池州屯駐軍馬依前太傅寧遠軍節度使
和義郡王加食邑實封制

門下聽鼓鼙而思帥孰能折於遐衝賜斧鉞以視師殆
無踰於英望仍其制閫寵以揚廷具官某識遽而明氣
剛以果聲颺朔野知虎頭燕頤之名書受邳沂非風角

烏占之術勇爵號萬人之敵洪鍾銘百戰之勲左右凝
嚴掌西漢羽林之衛始終福祿繼汾陽異姓之王近整
轅門外開幕府飭備有金湯之固分屯如箕翼之形遏
彼北鄰制於悍將靡思踐好不戒窮兵若孛斗之旄星
有踰淮之候騎雖丞相一勞弗憚偶未禡牙念元戎三
令已行宜申踧轍庶幾獨任可以有成是用誕舉徽章
特隆異數額錫盾雕戈之柄增淑旂元袞之威况國家
或置督軍皆宰輔用之立武惟此總干之命是為絕席

之恩更廣圭腴益光竹帛於戲諸將於是皆以兵屬朕
既付以重權匈奴不滅無以家為汝盍追於前哲必圖
來效庸副眷知

湯思退罷尚書左僕射同中書門下平章事兼
樞密使特授觀文殿大學士提領江州太平興
國宮依前特進岐國公制

門下冢宰佐王治國意實注於安危大臣以道事君時
具瞻於進退睠惟雅望久翊繁機既殫上印之誠宜厚

秉鈞之禮誕揚坦制亶告羣工具官某器宇清明材猷
超詣樂堯舜之道阿衡專美於有商品淵騫之篇揚雄
度越於諸子軒然俊域籍甚要津烜赫北門儼絲綸於
雅誥從容右府運帷幄之良籌結慈陞之深知應台階
之上象粵予纂紹復俾贊襄積熙載之忠規罄安邊之
潛慮循名責實所期公爾忘私應變守文常以今而視
昔方仰成之無間何引去之甚堅選衆舉臯陶任蓋尊
於一相事親若曾子養已泊於千鍾遂其膏藥之懷失

我和羹之助茲推渥典用賁歸途鼎秘殿之崇資食珍
臺之優祿式篤股肱之義以全體貌之恩於戲明哲以
保其身靡失青氈之舊喜愠不形於色可娛綠野之游
無起遐心斯能終譽

除陳康伯尚書左僕射同中書門下平章事兼
樞密使依前少保進封魯國公加食邑實封制
門下咨四岳有能奮庸實係朝廷之輕重圖舊人越惟
共政尤藉老成之典刑允諧虛左之求蓋積處中之望

誕敷渙冊亶告昕廷具官某用博而適時量宏而容物
閭與莫窺乎畛域奴隸皆知其清明學過況雄貫古今
之千載道侔伊呂踰前後之數公咸德慈闈有聲揆路
如著龜之決事以柱石而尊朝敵騎投鞭軫抱火寢薪
之慮周京奠枕賴濟川作楫之功輔我重華歷夫再歲
轉洪鈞之一氣塊圯無私陳泰階之六符規摹可久方
焦心多壘之日豈袖手東山之年申戒使貂趣迎公衆
庶交修於內治能潛弭於外虞是用再冠魁衡仍司樞

筦侈多田之真賦荒大國之新封以昭物采之儀以寵
巖廊之寄於戲武丁得一傳說斯商道之復興江左自
有夷吾宜晉人之相慶爾惟敬明乃訓邦其永孚於休
大同軍節度使提舉萬壽觀蒲察久安進封開
國侯加食邑實封制

門下朕虔卜上辛肇稱元祀合圓丘方土之祭誠格萬
靈倡七始華始之聲孝臻四極既涓成於縟典難專鄉
於蕃釐式獎厖臣誕敷丕號具官某性資純固氣識靖

深灌瓜昔在於邊亭削衽來歸於樂土陪周行而甚久
知忱節之可嘉不顧望以事君遠追大缺以篤敬而傳
國將若稅侯茲推賜昨之恩用答奉瑄之助乃荒侯社
併廣戶租以彰惠術之行以示褒章之勸於戲甘泉歌
鄒子之樂爰布青陽之祺徐廬同僕黜之封有加白馬
之約往肩忠報永迪燕康

除吳璘太傅依前奉國軍節度使四川宣撫使
領御前諸軍都統制充利州西路安撫使判興

州進封新安郡王加食邑實封制

門下擁齋鉞以護坤維夙賴長城之捍奉介圭而朝魏
闕宜膺華袞之褒疏絕席之殊恩講臨軒之顯冊迺
剛日用詔羣工具官某忠義本於天資智勇謂之人傑
書傳圯上非鳥占雲祲之文氣蓋關中固玉壘銅梁之
園乘邊茲久按堵如初左啟右肱聳戎車之四牡前兄
後弟超轅門之二龍靈旗遠憺於雄稜彝器屢銘於洪
伐寬予憂顧時乃勲庸爰注想於英規俾來趨於召節

馳驅萬里恭謹一心周邦我有良翰與人咸喜吳公隱
若敵國奕葉相望嘉福臆之壯猶稱魁梧之異表盍盼
徽數庸答元功象鼎面槐應上公于台宿苴茅裂壤開
異姓之王封衍彼圭畬敷其井賦以重登壇之寄以隆
制閫之權於戲戢弓矢而散馬牛方審包桑之意被介
冑而生蟣蝨敢忘細柳之勞往服寵光式酬親倚

保平軍節度使龍神衛四廂都指揮使提舉江
州太平興國宮王彥加食邑實封制

門下魯人類帝用駢剛於上宰漢代祀天歌青陽於肇
歲朕考前王之成憲遵烈祖之丕謨迺逢祈穀之辰獲
展欽柴之禮爰彰景况普洽縣區有若勁臣可稽渙命
具官某識潛武志材壯戎昭從枕席以過師屢書功伐
執干戈而衛社嘗護邊陲久分齋鉞之榮曲遂叢祠之
佚茲推茂渥不替舊勲用增采邑之封更侈食田之戶
以廣逆釐之慶以申錫昨之恩於戲開天庭以延羣神
既格宴娛之美建皇極而斂五福厥敷碑隱之休往服

輝光益臻弗祿

推誠順化崇義懷忠保信嚮德安遠承和秉禮
歸仁協恭勵節繼美功臣靜海軍節度觀察處
置等使特進檢校太師安南都護上柱國南平
王李天祚加食邑實封加遵度功臣制

門下朕卜辛日而用郊獲逢嗣歲陟午階而奠幣仰格
颺旂幸熙典之涓成與殊方而同慶具官某性資純一
節槩沉深紹奕葉之勲庸守藩條之信誓仁惠周於南

紀聲名慕乎中區輦書航琛不懈朝宗之禮撞牙茸肅
所資屏翰之雄視槐庭霖雨之臣兼柏寺風霜之職寵
之燾社虔若撫封茲循飲福之文用益紀功之號陪之
外戶侈厥真畬以裒侯度之恭以表靈釐之廣於戲主
祭而百神咸享敢專鄉於萬祥昭德于異姓之邦豈遐
遺於四裔其迎戢穀永底榮懷

盤洲文集卷十一

欽定四庫全書

盤洲文集卷十二

宋 洪适 撰

內制二

撫諭四川軍民詔

朕嗣守神器於斯三年迺瞻坤維邈在萬里會邊塵之
未靖致戎備之不除棄塞護關久矣采薇之戍踰山越
谷遠哉輸粟之勞或郡邑不值於循良故田里尚生於

愁歎茲選近臣之彥往專外間之權挾纊以慰軍情下
當戶曉褰帷以求民瘼大則驛聞推吾軫卹之恩酌以
便宜之制必令四境之安堵惟恐一夫之鄉隅儻休息
之有期庶榮懷而相慶

戒戢賊吏詔

朕聞先王之時人有士君子之行在位者皆節儉廉清
冰霜其操羔羊素絲之詩所為作也今則不然貪夫徇
利廉耻道喪亶以廣田宅厚妻子為計谿壑無厭漫不

忌憚甚者掩公帑之積私倉庾之贏賊民剥下浚其膏
血嗚呼豈設官之意哉朕自臨御以來崇儉德蠲浮費
庶幾戢風厲天下姦賊之吏未有聞而不治然速辜相
繼何耶是朕德不能化罰不能懼也古者刑不上大夫
唐虞畫衣冠而民不犯孰謂搢紳之士心無愧耻不若
古之齊民歟夫先甲後庚申飭教告而抵冒不已至於
用法豈得已哉凡我諸臣其洒心遷善勵淳白之節副
總核之政以長保其祿位無或不悛奸我重辟播告中

外使明知朕意

激論將士詔

朕祇奉慈訓嗣有基業永念祖宗陵寢朝獻路絕黎元
塗炭屯戍未休朕為人之後而不能報上世之憤為人
之君而不能振斯民之厄故食不知味寢不安枕未嘗
以尊位為樂也特以戰爭之役肝腦塗地不忍南北之
人枉罹非命自即位以來兩發聘使冀尋舊盟而鄰帥
主兵及境弗納行人再往始則立式邀求繼則迫脅囚

辱朕以兵隙難開隱忍自屈仍遣魏杞銜命復行不較
禮文書辭屢易不愛四郡割以奉之乃渝元約又求商
州且索臨陣係虜之人是其更變無厭必欲尋釁初無
休兵結驩之意今使命逗留議論不決積粟出船包藏
罔測朕以太上聖意不敢重違而宰輔羣臣前後屢請
已盡依初式再換國書歲幣成數亦如其議在我可從
無一顧惜若彼堅欲商秦之地俘降之人則朕有以國
斃不能從也儻或不諧前好至於交兵天實臨之非朕

得已想彼兵民厭其黷武亦當嗟怨況我將校六師受
國家爵祿之久忠義所激自應奮勇捐軀為國雪耻夫
立非常之事彰無窮之名釀賞厚賜朕不敢吝嗚呼兵
凶器也朕既無德以修二國之睦又無威以寢敵人之
謀時當三冬而使軍士有暴露之歎人民有轉輸之勞
害貽爾衆痛在朕躬凡百臣子當念興師用衆匪朕本
心我直彼曲動則有辭共輸報國之忠永享安居之樂

撫諭歸正將士人民詔

朕遣使約和首尾三載北帥好戰邀執不移自盧仲賢
初議則有畫定數事叔姪通書之式唐鄧海泗之地歲
幣銀絹之數及緣邊歸附之人朕志存好生寧甘屈已
書幣土地一一曲從惟念名將貴臣皆北方之豪傑慕
中國之仁義捐去舊染投戈來歸與夫軍士人民厭厭
殊鄉喜我樂土朕知其設意欲得甘心斷之於中決不
復遣前後書辭再三峻拒故彼逞怒無厭入我邊境若
朕利於和好之速成不顧招懷之大信依隨所欲驅迫

北歸則與淮北之民同為魚肉矣爾等當思交兵釁隙
職此之由視彼如讎共圖掃蕩高官厚賜自有明科傳
之子孫永保寧泰天地鑒昭朕不食言

親征詔

國家一祖八宗積累基業至於太上傳序在朕乘兵戈
擾攘之後境土裂為南北陵園廢於烝嘗二帝蒙塵終
天抱痛皇族荼毒所不忍言自踐位以來焦心疾首思
欲報皇祖之讎快四海之意而慈闈務行仁德羣臣多

主和議朕識不能料事誠不能柔遠屈已尋盟反墮姦計今彼擁衆涉淮犯我郡縣尚猶遣介持書邀索降將朕寧與之百戰豈忍驅逐歸義之士缺就屠戮昔春秋之時鄭小國也介居晉楚之間城下之盟君臣同耻收合餘燼尚能成功朕今丕冒東南幅員之廣帶甲之衆若忍辱事讎不圖一戰豈不貽萬世議已稽考故事展郊祀之期朕將親臨江淮率勵六師用行征討凡我文武軍民懷十聖二百年涵養之恩痛中原四十載分崩

之難奮忠出力不與讎敵俱生大可以成功名而取富貴次可以寧父母而保妻子皇天后土實佑此行布告邇使知朕意

視師詔

朕以南北生靈久苦兵革會敵帥有通和之議不憚屈已委曲如約既得四郡尚復邀求書札方來兵鋒已接朕識不能料事誠不能格物志在尋盟反墮其計使我士卒暴露民庶流離蚤夜痛心噬臍何及已稽典故改

卜南郊將臨江淮親御戎輅師有曲直蓋不得已凡我
文武軍民懷十聖二百年涵養之恩憤中原四十載分
裂之難奮忠出力勿負國家大可以取富貴而求功名
次可以寧父母而保妻子皇天后土實鑒此言已令有
司擇日進發所過務從節省並不得有所搔擾布告邇
遐使知朕意

又視師詔

朕以連年用兵戰士苦於暴露兩國交惡居此不能久

安會北師之欲和走行人而就議凡往來之要約皆委
曲而聽從即歸四郡之疆庶結萬年之好豈期得地又
復踰淮書札未回兵鋒已接使師旅冒於矢石生靈失
其田廬嗟爾何辜由吾不德想邇遐之扼腕空蚤夜而
痛心已展燔柴之期將尋細柳之舉親乘戎輅用靖邊
塵夫師克在和理自分於曲直兵應者勝鑒可質於神
明動蓋有辭事非得已惟我荷戈之衆士推轂之勁臣
懷累聖二百祀涵養之恩憤中原四十載分裂之難相

勉忠義共圖功名猶蟲蟲之嗜膚所當驅逐若熊羆之奮力豈畏艱難

改郊祀詔

朕惕臨寶位始祓泰壇已勅攸司肅繭栗齋盛之備將因長至展膺蕭圭幣之誠會有邊烽尚馳羽檄方治勞軍之計恐虧類帝之儀蓋事既問於甲兵則心不專於齋戒若昔魯史禮屢變於卜郊惟我昌陵日嘗移於近晦況當至道之載適值繼遷之虞詔以來春行茲元祀

舊章具在故事可稽參兩朝烈祖之規改嗣歲正陽之月庶幾祇敬可薦馨香宜頒一札之書用諭四方之聽

改上辛郊祀詔

朕比以軍興未遑郊見欲涓建巳之月已戒先庚之期幸消弭於外虞懼稽遲於大報敬惟元日正得上辛合魯經啟蟄之文法周室用辛之禮神釐可逆猶漢帝拜于甘泉祖武是繩蓋太宗行於至道式從改卜虔舉彝章

皇帝答皇后詔

勅皇后夏氏朕祇臨寶祚初展稔容涓肇歲之上辛得
元日之吉亥嘉籙薦饗雅樂繹和曾霄呈明概之祥繇
寓洽厖鴻之慶端由內助獲舉精裡載閱芳函益深褒
詠

賜王彥獎諭詔

軍律之弊久矣握兵者背公徇私相率成風朕當饋而
歎將誰使革之卿智勇篤誠山西之桀召自萬里倚重

江介不唯賴卿威望籌策以訓兵固圉亦欲號令紀律
為時標準也故將之去偏裨輿皂紛然升進羸弱冗食
者衆曾不經意卿甫入轅門即能釐正忠實可嘉不負
親擢人悉如卿朕何憂焉

賜劉寶獎諭詔

古之良將心在國家者當待敵之隙必以屯田為事今
並塞多曠土朕欲舉行便宜十二利遣九卿持節商度
之未有大將奮然為諸軍倡卿奉公體國自請留屯將

以豐邊儲而省漕輓與避難懷誕者殊科至於修治障
隧汰簡將士咸振閫外之職忠勤如此朕甚嘉之

賜王彥威方時俊皇甫倜獎諭詔

淮之西瀕塞數千里朕留意戎備不敢忽異時將帥不
以國事為懷視它壤有故陰拱而不恤若秦越肥瘠者
有之卿提兵扞城根於忠赤列戍同心謀無崖異興治
關隘修設烽燧所以固封守杜侵軼勢若常山之蛇諫
大夫諭使指而歸具為朕言之防邊有賴嘉歎不忘

賜潘清卿等乞以秦國大長公主所留金銀助
視師犒勞之費不受獎諭詔

漢武帝時干戈日滋大農所儲不足以奉戰士至出御
府禁臧以贍之而鼎貴高訾之家不拔一毫以佐縣官
之急輕財體國四海之內卜式一人而已耳卿等戚畹
之彥心在王室願輸橐裝以助軍須忠款如此與賊
為我者殊科顧卿新有陟屺之難養生送死之費未艾
也朕亦安忍取而用之嫠不恤緯允蹈斯言載覽所陳

不忘嘉歎

賜吳璘為發遣吳拱於祁山堡等處掩殺敵人

大獲勝捷獎諭詔

強敵騁兵騷我四鄙迺睨西垂之遠尤深中具之憂卿
忠智根心策慮超卓遣發將士動中事機祁山之役大
有斬獲捷布既至良用歎嘉所期元戎殄殲勁敵用馳
一札少寓褻懷

賜吳拱於祁山堡等處大獲勝捷獎諭詔

敵人寇邊再變月律將帥罷怯未成偉功朕當饋而歎
時無頗牧賴汝父子家傳方畧天授智勇必能為我杆
西鄙之患果聞捷音大翦獍悍更期盡力勿使生存國
有恩章朕所不惜


賜王彥時俊戚方獎諭詔

夫設險隘以固國嚴烽火以守邊自古不易之道也卿
董我師旅久屯於淮外無犬吠之警則已賢於長城矣
輔臣有言汝悉心竭力修障隧備塞之具無一不治嘉

汝忠勤喜見於色金帛之賜庸示眷懷見知則說尚其勉之

賜姚憲乞以糴到米一萬石助平江府常州關
乏獎諭詔

夫以鄰國為壑者徒知乎為我視越人之瘠者不足以
語仁爾治郡可稱救菑有術損贏餘之萬斛助比近之
二城免吾移粟之憂嘉爾汎舟之役用頒細札以示褒
懷



盤洲文集卷十二

欽定四庫全書

集部

盤洲文集卷十三至

詳校官庶吉士_臣初喬齡

主事_臣呂雲棟覆勘

總校官編修_臣王燕緒

校對官中書_臣李斯咏

謄錄監生_臣李青燈

欽定四庫全書

盤洲文集卷十三

宋 洪适 撰

內制三

賜金安節辭免吏部尚書兼侍讀不允詔

勅安節省所奏辭免除權吏部尚書兼侍讀恩命事具
悉朕惟六官之長莫非民譽三銓之柄尤在得人以卿
篤實剛方颺聲中外再儀禁路迨今累年碩畫嘉謨据

公守正瑣闥之望如烏臺時松柏後凋在廷寡二小天
典選見謂清平申命于茲作我常伯露門進讀班列益
尊奚為執謙尚格成渙所請宜不允

賜徐林辭免給事中不允詔

朕愛惜名器不輕假人侍橐才難寧刊印而不予卿古
之直諫為國老成勇退再三色無喜愠久不見賈形之
寤寐瑣闥虛位無以易卿曷為引疾未聞命駕一節以
趨當事斯語

賜張浚再辭免恩命不允不得再有陳請詔

王者守大公之道用捨不可以私君子高易退之風出處誰得而議卿三朝舊德四海美名雖嘗垂翅於回谿必欲快心於狼望掌握重任勤勞累年精神既折於遐衝體貌宜加於異禮游披來奏未諒茲懷亟祇渙汗之恩可絕謙撝之請

賜張浚第三辭免恩命乞致仕不允不得更有

陳請詔

朕去月丁丑嘗告大昕之庭以貳公極品重鎮節旄貴卿七閩之行卿迺輕軒冕薄方面殆欲長嘯東山繼韋賢疏廣之迹翛然之志節則高矣美矣人其以朕為忘耆哲而忽典刑也三章固辭命不可反

賜兵部尚書湖北京西路制置使虞允文乞宮觀不允詔

朕以遺祿未清戎事為大專閫重寄倚我寶臣卿潛筭可以料敵雅望可以折衝備禦之策厥有功緒襄漢仍

年無犬吠之警賢長城遠矣需封再至迺欲優游林壑
以成易退之名將使朕焦心西顧日昃不得食於汝安
乎少須艾寧歸斷國論

賜資政殿學士知潭州黃祖舜乞宮觀不允詔
長沙壤閭民繁一都會也夷獠錯雜其間連率不稱職
則有弄兵山澤之憂卿機宥之老望實隱然息偃于蕃
效見寧謐朕方以得人為喜貢章句間難以曲徇

賜汪應辰辭免敷文閣直學士四川安撫制直

使不允詔

坤維之壤邈在一隅方伯之權隆於九牧卿有尊主庇
民之學負昂霄聳壑之材偃藩累年方駕前哲將馳一
節入補從橐之虛乃睠四川會有高牙之闕與其尊朝
以納朝夕之誨不若制閫以寬宵旰之憂萬里甚勞此
行六閣未足為寵如尊乃勇顧蜀道以何難維周之翰
使雪山之益重

賜宰執湯思退等乞全免南郊支賜不允詔

朕將執犧牲圭幣初見上帝實賴二三股肱之臣秉德
顯相以竣祠錯事卿等行為世表濟我儉德匪頒之式
三分損二仲春丙子制書著為令矣忽攬來牘又欲悉
免所賜雖由衷體國陳義甚高若盡廢舊章殆非中道
賜龍圖閣直學士趙子瀟辭免知福州不允詔

七閩居鯨波之湊亡命者或沉浮其間必威愛兩全能
蘇枯鋤姦然後勝連率之任卿材堪理劇所至瘡人尹
京之美如漢趙張弭盜鄞川桴鼓不警徙鎮有命宜疾

其驅毋使吾民歎於來暮

賜戶部侍郎淮東宣諭使錢端禮乞宮觀不允

詔

朕垂意邊防日昃或不暇食自淮以往簡兵調馬豐財積粟謹堡障備器械其素定之策固已斷然於中卿智畧輻湊有憂國之風嗤空言務實用朕故輟之論思倚以治外雖官以諭指為名實行督軍之事卿叱馭甚勇圖上方畧剗剔蠹弊咸契朕心迺歸奏陳備見計慮歲

云秋矣豈以疾求去時耶日昃再行寬我憂顧

賜錢端禮辭免吏部侍郎不允詔

卿學問淵源於今古論議燭察於是非再掌民曹久勞
心計出使淮甸如朕親行念累歲之用兵獨武銓之撓
法仕者徼幸而得志吏或並緣而為姦非資通練之材
曷抹放紛之弊雖然少進蓋匪超遷何須踵故之辭尚
事循牆之避

賜戶部尚書韓仲通辭免荆襄制置使不允詔

善保家者必固其四壁然後穿窬之患可弭善養生者必衛其四體然後晦明之疾不作朕軫慮邊陲常若臨敵東起淮泗西抵秦蜀以吾三從臣分專閫之權矣襄漢介乎其中繇地數千里百將所屯障隧相望指麾總統厥寄匪輕卿蚤歷險艱能知兵事久儀禁路備見嘉猷憂國惓惓實惟素蘊折衝制勝倚俟茂勲上牘執謙迺為稽命

賜尚書左僕射湯思退生日詔

仲商之吉清籥將中詠崧嶽之降神夢傳巖之賚粥有
若伊陟格帝式賴宏樞可與王喬爭年宜膺壽嘏迺申
蕃錫庸體睠懷

賜皇兄岳陽軍節度使開府儀同三司居廣生

日詔

九秋強半萬寶寢成惟時宗英集此間氣庸舉廩庖之
錫以榮弧矢之辰宜服寵光用迎昌熾

賜崇信軍節度使開府儀同三司充萬壽觀使

趙密乞致仕不允詔

卿識潛李法名壓花卿蚤揚貝冑之威入護羽林之士
伍符甚整師律可稱茲聞館之均休俾昕朝之借重據
鞍矍鑠誰謂伏波之衰扣楫掃清未減祖生之志奚為
上牘遂欲挂冠益務葆宦毋輕眷倚

賜吏部尚書金安節乞致仕不允詔

朕讀詩至於雖無老成人尚有典刑書至於尚猷詢茲
黃髮未嘗不輟卷三歎蓋養老乞言古昔之令典而限

年致仕仕進之常規也禮經之制迺為碌碌凡材戒之
在得者設若不得謝豈虛文哉卿年高德邵名聲四馳
魁壘尊朝徒得君重今百僚楹然紳佩相映顧不能容
厖眉一老以表儀班列耶捨朕而去人謂斯何

賜賀允中赴闕詔

朕總攬紀綱規恢緒業思得黃髮台背之傑尊我朝廷
若覩景星鳳凰之祥編之圖牒卿器宏而用遠學廣而
聞多道可侔於臯夔言必稱於堯舜清節懿行表諸薦

紳讜論嘉猷爛其章奏令德無古今之間美聲洽中外
之傳崇易退之風尚抽簪於壯歲佐更張之政實補袞
於慈闈有懷典刑每勞注想茲借露門之職俾均雲闕
之休蓋大臣以憂時為心非常人拘謝事之制矧期朝
夕之誨勿託春秋之高安石將如蒼生何難循牆而固
避魯人猶望高子也其叱馭而疾驅特講舊章始盼溫
詔睠惟碩輔必體至懷

賜湯思退等為水潦害稼待罪不允詔

朕德不足以感召和氣迺邪陰奸陽常雨為罰水不潤
下傷我百穀今駐蹕於茲吳中蓋根本之地而膏腴之
鄉也歲一不登如公私何卿等宜圖內外之治思政刑
之失求揀菑之方叶心力行消去變異以副朕應天憂
民之實合辭引咎非所願聞

賜湯思退等為水潦再上表待罪不允不得更
有陳請詔

朕以政之失中水不就下思銷復之策方盡心焉引變

調之譽既聞耳矣菲躬有過台輔何嫌解琴瑟而更張
賴於協力歸印綬而自劾勿復費辭

賜趙密辭免少保乞守本官致仕不允詔

卿執戈衛社有籍甚之雄名結髮從戎迨皤然之暮景
久奉祠而均佚忽貢牘以遺榮懇請既堅去心莫遏茲
陞華於少保用疏寵於老臣何須樞僕之詞未體寵光
之意亟其祇服夸彼等夷

賜金安節辭免敷文閣學士不允詔

疏廣盛東門之錢觀者皆賢孔戡懷北陌之游去之何
果卓然夙望踵此高蹤卿道不詭隨言皆至當烏臺謬
諤寧抑厭而退藏青瑣昂昂實剛方之素蘊良金既已
百鍊喬木聳其千尋忽輕禁索之榮遂起安車之興念
羽儀之迫賴况筋力之未衰屢攬枕封勉從雅志雖無
人乎子思之側長者不留抑使親聞伯夷之風頑夫丕
變用躋內閣之職俾對昕朝而歸優任子之常科盡貪
賢之異禮尚勞沖挹昌副眷私

賜虞允文辭免顯謨閣學士知平江府不允詔
卿名馳禁路材軼英躔羽扇綸巾嘗掃舟中之敵輕裘
緩帶久宣塞上之勞會吳郡之闕人聽輿言而出命陟
之內閣重我輔藩使道路不復拾遺則京師於是蒙福
事無可避行也勿遲

賜賀允中辭免落致仕提舉萬壽觀兼侍讀不
允詔

朕願見耆艾不啻饑渴惟時舊德近在數百里間迺下

尺一之詔使之乘驛造朝濟我國論卿左右承燭天下
達尊聞命幡然朕心以懌惓惓不忘君真古之所謂忠
臣也歟祠庭經幄何以辭為

賜皇子鎮洮軍節度使開府儀同三司恭王生

日詔

節兩間而吹律式對盛秋艮三索而得男是占吉夢惟
璿源之毓粹宜貝闕之延休爰飭恩盼以崇壽豈

賜資政殿大學士左通議大夫致仕賀允中辭

免知樞密院事兼權參知政事恩命不允詔

朕假人不以名器寧或虛員執政其猶股肱相須成體
眷本兵之任重久選衆而才難既得老成之典刑必致
樞機之周密卿忠在王室行如古人博物洽聞言謨有
補於世獨行特立卷舒不隨乎時造朝無俟駕之淹接
畫非括囊之比蔽自朕志冠於宥庭仍參預于大鈞迺
弼諧之舊物紀綱益振帷幄可尊亟祗兩命之榮勿執
三休之美

賜淮東宣諭使錢端禮乞罷遣不允詔

趙營平畫軍冊是其計者初什三中什五最後什八宣
帝聽之不疑故功名垂於亡窮卿銜命治邊于今半載
忠謀潛畫纖悉曲折犁然當於朕心公卿議臣亦未嘗
有異同之論也何疑上書遂欲解印綬去朕方治使者
車結二國之好庶幾邊城有晏閑之期夫為山九仞功
虧一簣毋憚小留以訖成績

賜起復檢校少保威塞軍節度使充河北路招

撫使建康府駐劄御前忠毅軍都統制蕭琦乞
宮觀不允詔

朕捐高爵推赤心以待將帥熊羆之士無此疆爾界之
殊庶幾得人如金日磾渾瑊等輩宣力成功方駕前古
卿驍毅冠軍策畧深遠銳然右衽不爽初志入對便朝
誠諒有餘朕所以寵之齋壇授之將鉞冀汝忠義奮發
副我倚信神明扶持何恙不已求閑之事勿效虛文

賜太傅寧遠軍節度使和義郡王楊存中生曰

生餽詔

日躔井宿對桑弧蓬矢之辰天佑將星得燕頷虎頭之
相彝鼎紀殿巖之績袞旒膺王社之榮恩錫有常壽臧
斯介

賜張浚辭免少師保信軍節度使判福州恩命
不允詔

朕以卿連年督軍殫耗心志復調台鼎坐不煥席跋履
江淮之間風纚露沐亦已勞矣方趣來歸而抗章再三

欲退赤松之游詔旨雖頒顧不得而留也躋榮亞師蓋
非常典齋鉞之拜在儒者則以少為貴始終眷遇所以
寵卿之歸抑無負矣全閩之寄慰彼去思又何以辭為

盤洲文集卷十三

欽定四庫全書

盤洲文集卷十四

宋 洪适 撰

內制四

賜少保觀文殿大學士充醴泉觀使福國公陳
康伯辭免判紹興府不允詔

卿道蘊夔龍名參魏邴久處中而當軸能亮采以惠疇
懷赤松之游遂輕元宰享綠野之佚既閱三時瞻岳狩

之輔藩起巖瞻之舊德幾禡牙而為重茲擊析之可聞
尚馳稱疾之章未動趣裝之意先一州而後天下已有
愧於是言潤九里而福京師豈遂忘於斯世即期引道
勿事循牆

賜知樞密院事兼參知政事賀允中乞依舊致
仕及還納前後錫賜恩數不允詔

卿夙鍾蹕絕之材內抱經綸之志鍼膏肓於泉石惠然
肯來訪謀謨於廟堂酌焉不竭政賴同寅之助庶圖再

造之勲又欲挂冠曾不暖席豈朕尊賢之禮有所未至而卿致主之道亦不克終勿輕去就之懷有負倚毗之意

賜左僕射湯思退辭免都督江淮軍馬不允詔
夫有文事必有武備孔子所以克齊無智名而無勇功
張良用之興漢雖戰陣不逮瑚簋之學而籌策自高帷
幄之中顧方畧之何如豈儒術之無益卿臨機有斷燭
理甚明已能制勝於兩楹何憚啟行之十乘惟善致君

者必欲立事恐不知我者謂之辭難宜畧撫章以圖成效

賜少保崇信軍節度使趙密辭免落致仕權殿前司職事不允詔

昔馬服善兵能成閼與之績營平雖老不憚金城之行以卿久護周廬屢專勇爵必能追於鼻祖尚有志於庸公迺出異恩俾還舊服無謂挂冠之後遂忘持戟之忠其體眷懷勿拘辭避

賜太傅寧遠軍節度使醴泉觀使和義郡王楊
存中辭免同都督江淮軍馬不允詔

朕留神以治軍政拊髀而思古人命丞相以董師將展
百邊之餞有元戎而共服更增十乘之光卿甲令稱忠
太常紀績闕茂深遠洞龍歿應敵之機福艾奇厖得虎
頭肉食之相當兵革未能休息豈英傑可以韜藏謀上
將以貳元台賢長城而開大府幾萬全之良策成七德
之峻功渙命已行謙辭勿講

賜左諫議大夫淮西宣諭使王之望辭免參知
政事不允詔

卿乘駟馬車入蜀十年之間徧持使節兵民疆場之事
無遠近巨細皆知之而學可以伸其志文可以暢其說
材可以任重致遠謀可以見微炤隱邦家之傑君子之
光也諭指淮壖邊備其設奏函鼎來輟食嘉嘆與其外
治於軍政不若歸協於廟謨蔽自朕心躋之兩地夫君
臣遇合千載一時趣裝亟來勿執謙槩

賜吏部侍郎淮東宣諭使錢端禮辭免兵部尚書都督府參贊軍事不允詔

夫能折衝者君子之謀不避難者忠臣之職卿受任撫邊悉心盡慮城隍兵甲芻粟之事處之善矣朕以交鄰之始將帥之心未一故建督府以重其權命爾為大司馬以贊之庶幾制勝定功舉無失策再三稱疾朕何望焉

賜左僕射湯思退乞罷機政不允不得再有陳

請詔

大丞相所與朕決中外之計以身為天下安危者也君臣之間無纖芥猜嫌何為連章直欲歸印朕焦心勵精內修政事過衝固圉外治軍旅以文武二柄剴屬任一相庶幾適安遠肅奠枕于京使朕仰有以奉慈闈之歡俯有以遂元元之樂則卿亦有無窮之聞也夫忠臣在則畝猶不忘其君卿圖回廟堂任重濟難勞亦至矣無謂大雅保身而輕為此去就也

賜左諫議大夫充淮西宣諭使王之望再辭免
參知政事乞宮觀不允詔

卿稟川嶽之暉有公輔之器英名擅乎中外奧學達乎
古今經武整軍憂遂寬於肝食料敵制勝明蓋察於秋
毫既強本以折衝能運籌而合意俾參大政冀展壯猷
有德進則朝廷自尊詐謀斯寢真儒用而天下無敵治
效可成其報非常之績勿牽至再之請

賜給事中吳芾辭免吏部侍郎不允詔

士君子公耳忘私當官而行烏有親疏曲阿之患然三

尺法大為之坊

缺

非為端人正士

缺

也爾能養剛大之

氣素擅直方之名甫入東臺正賴糾駁輔臣有連必無

偏黨援此再疏

缺

甚力朕亦不欲使汝破律造端也小

缺

雖高抑汝要路夫何辭之有

賜參知政事王之望辭免督視江淮軍馬乞致

仕不允詔

朕以境土分裂宿憤不攄顧瞻中原未嘗一日忘於心

仰稟慈謀俯從廷議屈意尋盟固已逆料其不成也敵
人無厭竟為戎首卿習知邊瑣智畧縱橫揆策運籌吾
見剛者鈞軸之拜所恃有為今禦侮捍衝機不容髮非
揖遜抹焚從容拯溺之時以卿憂國之忠吞敵之氣必
能執言不復避事視師之命舍卿而誰勿淹引道之期
何俟清邊之効

賜左僕射湯思退乞罷機政不允詔

昔越勾踐苦身焦思圖報強吳謂鎮撫國家親附百姓

蠡不如種故舉國政屬之種而使蠡治兵甲之事内外
得人終刷會稽之耻今強敵尋戈犯我邊鄙雖卿受任
董師前有成命念排難圖全在予左右其責甚大一相
之動

缺

易搖非奠枕于京之計也慮之再三權其輕

重

缺

代此行舉棋不定朕則有愧委而去之

缺

同患之義乎

賜湯思退辭免觀文殿大學士不允詔

卿再相樞垣忠勞備至塞氛孔熾尚賴畫策出奇之助

悠然而去朕甚惜之規殿美名所以增衮衣之光亦卿之舊物也過形沖牘豈諒朕懷

賜楊存中辭免都督不允詔

朕以敵人犯塞師衆在邊欲專總統之權用注安危之意凡我戎役咸聽指麾庶三令五申之明無十羊九牧之患以卿老於戎事積有智名必能展於壯猷遂克成於偉績徽草已播輿誦謂宜益肩衛社之忠勿講循牆之避

賜陳康伯辭免召赴陪祠不允詔

朕有懷英衮隆顯相於郊禋已播明緡俾復持於國秉
茲披前牘難廢細書勿稽命駕之期終覲奉璋之助

賜兵部尚書錢端禮辭免端明殿學士簽書樞
密院事不允詔

朕疇咨雋望入贊神機冀攄帷幄之謀用應甲兵之問
茲披來牘乃徇撫文況當多壘之秋豈是循牆之日亟
其承命副我虛懷

賜顯謨閣學士虞允文辭免端明殿學士同簽書樞密院事不允詔

朕以敵國阻兵怙強構惡非有厭難折衝之材者豈足以居本兵之地以卿文而缺武所慮甚長疇昔視師決舟中之勝名已知於江淮草木矣暨使陝蜀臨荆襄驅馳兵間洊開幕府料敵之策整軍之術蓋從容于胸中迺稽輿言俾贊宥畫撫章來上非我欲聞

賜陳康伯辭免尚書左僕射不允詔

朕外治邊虞內虛相位區處甲兵之間不勝宵旰之勞
望卿之來以日為歲卿以經邦元老固當與朕同憂拯
溺拯焚非規行矩步時也

賜參知政事周葵生日詔

月律就盈星躔分秀篤生哲輔能攀房杜之名申錫恩
盼用介喬松之壽

賜吏部侍郎吳芾辭免數文閣直學士知臨安
府不允詔

王城雜五方之民彊凌弱衆暴寡京尹威望不立則姦
宄椎埋無復忌憚况有撓其前掣其後者非剛毅自信
未易以辦治稱也卿屢把麾符威而不猛有興利除害
之政有蘇枯摘伏之聲典治吏銓浸耘蠹弊彈壓輦轂
直差易耳內閣峻職庸示寵光毋守沖懷亟圖善最

賜草土沈介辭免特起復原官顯謨閣直學士
知鄂州兼鄂岳江黃州漢陽軍沿江制置使不
允詔

夫忠孝臣子大節朕豈固欲奪人陟屺之哀而遂廢凱
風之詩也蓋公家之事有急于私壺則君子當權其重
輕不以報親追遠之情而忘憂國事君之志雖欲躬曾
閔之行然移孝為忠古人蓋有變禮而不可免者今敵
人南侵撥我四鄙襄漢亦交鋒刃惟長江上流所以襟
帶東南也思得有文武威風善方畧者往當一面庶幾
遏衝禦侮寬我民食迺建使名俾臨沔鄂疇咨中外無
以易卿勉為朕行勿復固避

賜陳康伯再辭免尚書左僕射詔

夫天子以論相為職得賢可以永安人臣以憂國為心
有疾猶當彊起若濟川必俟舟楫如作室難虛棟梁明
良相須今古不易朕猥以菲德仰承燕謀惟我大儒首
陪初政迨茲多事無出舊人雖老成當遂其燕閒顧內
外適丁乎紛糾所資忠計用集治功況宰臣未至而先
除在國朝絕無而僅有宜思注意之重勿以卧疴為辭
日冀兼程副予虛佇

賜參知政事周葵乞賜黜責不允詔

卿輔朕踰年肅敬有守明於治亂忠無隱情贊襄政機
罄竭勞瘁方今內治未舉外寇孔熾政賴股肱之老同
寅協恭計安天下上書引咎是彰朕之未燭也勉安厥
位圖所報焉

賜敷文閣直學士王剛中辭免翰林學士兼給
事中不允仍特免迴避祖諱詔

卿學博古今文搞黼黻有潛藩師氏之舊實儒黨人材

之英使之潤色於訓辭可以追蹤於典誥仍司封繳所
賴論思茲覽遜章具知冲守謂祖名之相犯在官稱而
有嫌惟公義當奪夫私情況王制可屈其家禮唐李賀
不舉進士已為韓愈所譏畢士安之居北門弗避義林
之諱勿拘撓節即服恩綸

賜王剛中辭免改除禮部尚書兼給事中直學
士院恩命不允詔

昔帝舜之戒伯夷曰夙夜惟寅直哉惟清朕以卿直清

之操比方前哲既懇避家諱屈以玉堂之直矣秩宗虛位用尊禁聯夫批敕視草而決聚訟之議儒者之榮何以過此往哉惟欽勿復謙固

賜周葵辭免資政殿學士不允詔

君子達而在上居台輔之位使朝廷尊安遐邇賴福名遂而歸嘯傲丘壑以松竹為藩籬以鷗鳥為朋儔進退俱榮豈不超然有餘裕哉卿望傾後學屢上要津遵道而行不合則去晚陟政地熟聞嘉謨所賴贊襄以格上

治而賦歸甚勇指疾錮辭挽之再三不得而強規殿美職厥有彝章成命已盼勿勞謙避

賜陳康伯辭免兼提舉玉牒所監修國史提舉
編類聖政不允詔

夫修玉牒之文約金匱之史纂慈闈之政皆國家信書大典垂之不刊非鴻儒比良遷董者未易居其職上台典領厥惟舊矣機務之隙毋以筆削為勞也

賜郭振辭免捧日天武四廂都指揮使不允詔

十月已卯敵入絕淮始禍我濠焚我盱眙吞噬我楚迭
我合肥蹂躪我固始侵掠我舒城虔劉我臨滁睥睨我
六合我師分布於兩路而外禦之功無聞焉卿許國盡
忠奮勵士卒寒旗斬將首奏膚功有進死而無退生捷
音既騰為諸將軍之倡冠職交戟非曰賞功何必撓辭
以過成命

賜陳康伯辭免長男偉節除直秘閣次男安節
賜同進士出身不允詔

夫寓直蓬山有登瀛之美列名科籍如折桂之榮要路由此權輿士林之所欣豔卿柱石之老邦家之光肯力疾以造朝見竭忠而憂國顧無優禮可示矜懷既給扶獲上于禁墀故疏寵用霑于子舍蓋祖宗嘗行之事在簡牘具存其文荐覽來章力辭異數當勉承於恩意勿固執于撓情

賜沈介辭免權兵部尚書不允詔

朕以卿資兼文武材出等夷運籌可以折衝整軍必能

固園畀之名節奪爾倚廬闌外之事則制之專屬荆襄
之任舟中之指可掬也仍總江淮之師方邊患之未清
顧詐謀之難測勉思至計以解外憂惟茲常伯之遷實
允與人之誦當體艱難之寄勿為偃蹇之詞

盤洲文集卷十四

欽定四庫全書

盤洲文集卷十五

宋 洪适 撰

內制五

賜王之望辭免端明殿學士不允詔

朕承洪業託士民之上若涉淵水未知攸濟思得天下
之傑合謀相輔以成治功故高位厚祿所不敢惜以卿
有慷慨之志更中外之久迺自首諫躋之政塗今蓋未

幾也而雅懷莫遂公論弗孚雖欲留以自近顧不可得
書殿美職乃進退大臣之優禮何至遂有掛冠之請哉

賜步軍司後軍統制崔臯辭免鄂州觀察使不
允詔

朕注意戎事醲於用賞高秩美官未嘗愛惜執此之信
有如皦日卿扞敵淮壤厥有茂勲吉語首馳朕心以懌
觀風之任蹤等而遷益思盡忠勿事冲避

賜錢端禮辭免參知政事兼權知樞密院事不

允詔

昔舜命九官濟濟相遜奮庸亮采靡事不理朕甚慕之
卿學足以行道識足以決疑入踐鈞樞能斷國論疇咨
選衆宜幹政機兼冠宥庭助我經武撫詞相推無愧於
古渙汗不反亟其祇服

賜虞允文辭免同知樞密院事兼權參知政事
不允詔

朕以眇身獲保宗廟天下治亂在予一人非邦家之英

同德一心裨助萬務則安能有濟哉卿充積學問練達
事機中外踐更所言可績比參宥畫具見良圖宜副本
兵兼預政柄贊襄之效倚俟有成祇服恩榮無勞謙挹

賜王剛中辭免端明殿學士簽書樞密院事不

允詔

朕兢兢業業一日二日萬幾寤寐有德之輔天下賢哲
肯從我遊者吾能尊顯之卿有佐王之學有拔俗之材
入從出藩咸著顯聞復還禁路風望隱然入助籌帷孰

曰不可循牆之避非所願聞

賜戚方辭免捧日天武四廂都指揮使不允詔
宰輔以汝求免廂部事入奏夫爵祿者朕所以厲世磨
鈍也介冑之士有安邊卻敵之効達於朕聽賞不旋日
惟恐忘其功也卿忠不顧身名副其實旂常有紀褒律
匪私宜畧擢詞亟祇茂命

賜皇子少保鄧王懌生日詔

新穗歷於三微甫迎獻歲視賞階之雙秀厥有休符為

吾元子之祥得彼列僊之壽爰推恩渥以頌熾昌

賜太尉昭信軍節度使曹勛生日詔

歲籥更端方歌青煒之曲禁門通籍不隔赤松之游式
盼牢醴之珍用介衮旒之壽

賜簽書樞密院事王剛中生日詔

勅剛中獻歲發春景踰三宿元精生佐秀括五行爰推
盼式之常以相壽祺之永

賜左武大夫宜州觀察使龍大淵辭免落階官

不允詔

朕踐好之始擇材為使必得長於專對者以堅二國之盟卿講習古訓識慮淵深久於潛藩終始如一盡忠致主畏遠權勢出入禁闥厥有休聲張旌越疆弗憚遐阻俾脫橫列正名康車慶不虛行無事撓固

賜陳康伯乞解罷機政不允詔

朕以菲質膺太上傳授之重蚤夜懍懍不敢以位為樂念宰相助理萬幾圖任之失則不特噬臍之悔而已故

力起舊德還以魁柄衮繡復來即日無甲兵之間顯相
肇祀天閭其祥殆亦變理之效也方倚碩望尊彊朝廷
雖目青未平顧豈不能奉我清閒之燕坐而論道乎上
印勾歸朕不敢聽

賜參知政事虞允文乞宮觀不允詔

君為元首臣為股肱蓋一體相須所以合謀同德計安
天下者也卿輔政半載屢告嘉猷筋力方強思慮甚審
何嫌何疑遂欲引疾而去詳味來章深所未曉

賜虞允文乞宮觀不允更不得再有陳請詔

卿秉尊朝之德有憂國之風造膝惓惓備見忠款朕方倚以為治庶幾虜厲無前之績未嘗有纖介之間也移疾旬閒何易退如是耶載覽所陳難以曲徇

賜知福州趙子瀟乞致仕不允詔

大夫七十而致仕蓋血氣既衰懼其漏盡鐘鳴而不知止足之戒故先王制禮大為之防而後世以此約三尺之法也烏有神明之胄筆橐之傑齒髮鼎盛治有能名

而欲抽簪高蹈則國家安得而從之囊封啟來政爾辭
費亟其視事勿復卧閣

賜凌景夏辭免復徽猷閣直學士不允詔

朕推紫壇之澤于四海無遠邇之間況甘泉之舊乎卿
性資夷粹操履端方出鎮藩維有慈祥之政入司銓部
有平允之聲歸憩叢祠未尋故步茲還內閣之職實聽
輿人之言奚用撓章尚留茂渥

賜王大寶辭免禮部尚書不允詔

卿履道醇固蓄德雄剛從列諫坡積有令問退休林壑
恬適泰然超節遠來得惓惓不忘君之誼入對文石筋
力未衰宜長春官用資獻替之益已盼渙命奚事撝文

賜趙密再上表辭免少保不允仍斷來章批答
省表具知朕講修軍政睽遇一臣念堅甲利兵嘗冒死
亡之地故高秩厚禮特優終始之恩茲宿將之告休以
貳公而佚老使師衆益思於報國知朝廷不負於用人
朕命已行汝辭毋再所請宜不允仍斷來章

賜賀允中再辭免知樞密院事兼權參知政事

恩命仍斷來章批答

二老來歸於西伯以齒為尊九官相推於舜朝匪辭所
命我圖耆艾俾典事樞庶幾制勝於兩楹如彼運籌之
三傑國有成渙人無間言當思遇合之難共講治安之
策畀之召節既不鑿坏以為高覽此奏函何乃叩閤而
未已

賜文武百僚湯思退等上表請皇帝御正殿復

常膳不允批答

涉秋以來天作淫雨害我穡事朕仄席輟餐惕然靡寧
天裁眷至夫豈偶然朝思夕維顧無以仰答謹告雖沴
氣欲解而沈沒之田農方告病公卿大夫有足國惠民
之策能紓我之憂則為愛君復常之請姑置之可也

賜湯思退等再上表請御正殿復常膳不允批
答

永初遇雁電之異不陳庭下之車祖已戒雉鼎之祥尚

改廟中之祀顧予不德方古有慚雨集七八月之間遂
成積潦郡災什四分以上迨及數城雖采納於讜言亦
舉行於荒政莫救西成之害不勝南面之憂惟卿荐貢
於誠忱在朕正懷於抑畏上棟下宇難講大昕之儀右
截左轂敢豐中昃之御

賜湯思退等三上表請御正殿復常膳允批答
朕罪已畏威便坐未嘗安席齋心食淡厚味不復充庖
永念咎端敢為文具雖恐懼於斯而踰月顧貶損何足

以應天卿等咸造廣廷屢騰需牘具陳稽古之訓深見
尊君之誠陞九級而上廉勉從來請物百羞以俟饋祇
愧多儀所冀責難之恭交修除害之利

賜揚存中上表再辭免同都督江淮軍馬不允
仍斷來章批答

卿材資果毅謀慮沉深百戰摧堅屢奏藁街之捷八營
掌武父尊蘭錡之權時有弛張色無喜愠茲邊塵之未
靖豈王事之可辭當思注意之隆必奮折衝之効夫李

靖專用兵之善蓋房杜濟之以文若子儀堅事上之誠
故齊晉比之為偏宜蠲冲節往副廟謨

賜王之望再辭免參知政事不允斷來章批答
朕臨淵思濟寤寐實虔外而一路一州之寄內自郎吏
九卿而上曷嘗易以印綬與人况一二輔弼所與斷天
下事而繫國家重輕者哉以卿通達治體文武憲邦事
不避難精于遠慮必能同德合謀興今復古無愧於烝
民車攻之詩茲用決之朕心峻登政路非以私卿一已

之榮也卿當體朕責成之意夙夜孳孳同寅和衷發舒
賢縕以振可大之業屢章不已非所望焉

賜錢端禮再辭免簽書樞密院兼提舉德壽宮
不允仍斷來章批答

朕仰惟太上皇邁德勛華以神器之重傳歸在予雖一
月三朝竭四海之奉而綵衣間寢不獲旦旦左右若稽
皇祖嘗以廷臣領使於慈宮朕跽以有請而聖德謙託
因仍未遑也以卿受知兩朝出入禁闥況材高識遠籌

邊甫歸當此治外宜在樞機之廷崇我孝養立我武事
一舉而兩得之又何辭焉

賜虞允文再辭免同簽書樞密院事不允仍斷
來章批答

夫右府本兵蓋顯戎政北樞垂象實接階符茲求藝圃
之英俾贊籌帷之密既與言之相慶猶遜牘之重陳雖
謙冲者君子之常而忠力者股肱之事當思多壘遂展
勝謀勿徇撫情以留渙命

賜陳康伯再辭免尚書左僕射不允仍斷來章

批答

辛巳之役中外騷然卿坐於廟朝智畧輻湊雍容談笑
能解非常之紛今邊陲受敵丞相位虛思我舊人式遏
亂畧揚廷之後詔札屢頒衮衣來歸國人胥慶宜據遠
業遂寢撫詞

賜錢端禮再辭免參知政事兼權知樞密院事

不允批答

卿練習世故有猷有為喻度世事猶燭照數計而龜卜也朕知卿之材舊矣邇者贊右府兼政柄啟沃設施有久大之業試可而遷人望咸允辭至於再吾意不然

賜虞允文再辭免同知樞密院事兼權參知政事不允批答

文武之材繫於東西府二三大臣通國之望也朕以卿碩材不器輿誦所歸俾佐事樞揆策詳審俾參朝政告猷允臧詳試而進朕命不易雖復深詞難徇來懇

賜王剛中再辭免端明殿學士簽書樞密院事
不允批答

朕延登民望參莞神機陟三傑以同時監百王而治內
庶賴多筭匪求近功卿契合於潛藩崢嶸於禁路去國
之久靡人不稱甫持橐以尊朝宜擁樞而立武當遵批
語遂絕摛函

賜文武百寮宰臣陳康伯等上表奏請御正殿
復常膳不允第一批答

朕念戍邊之暴露躬避殿之焦勞雨雪載塗有感出車
之詠鉤星在漢未遑交戟之朝上天儲悔禍之休鄰壤
結寢兵之好雖探甲枕戈之士將遂歸期顧垂衣列鼎
之儀敢尋盛典

賜文武百寮等再上表奏請御正殿復常膳不
允第二批答

朕比警邊塵歌采薇而遣戍每懷戎幕慚細柳之勞軍
難因多壘之平便講正朝之禮荐披來牘具見勤誠宜

思治內之方姑緩復常之請

賜文武百寮奏請御正殿復常膳宜允批答

朕徹禁衛于兩階甫閱七旬之久損牽牢之百品敢陳
八物之珍念暴師露衆之勞行修德責躬之事雖得沉
烽之報未施挾纊之恩顧卜郊近齋宿之期欲上壽講
昕朝之禮勉從忱請徒積愧懷

賜吳璘辭免太傅新安郡王不允斷來章批答
朕執爵祿之柄以厲世磨鈍雖五兩之綸半通之銅未

嘗輕以假人況茅社之封槐鼎之任乎卿英望鴻烈為
中興第一卓馬來朝國人相慶大庭孚號僉曰允哉而
執謙再三偃僂之恭猶未已使朕褒顯功臣之意鬱而
未伸卿亦安取此亟其拜命勿復費辭

盤洲文集卷十五

欽定四庫全書

盤洲文集卷十六

宋 洪适 撰

內制六

撫問犒設荆襄將士口宣

有敕卿等奮忠許國探甲臨邊暑往寒來暴露良苦有懷制閫茲選近臣益勉功名用酬恩意今差戶部尚書新湖北京西路制置使韓仲通撫問荆襄將士其犒設

依兩淮宣諭司體例支給想宜知悉

賜三省官滿散天申節道場香口宣

有敕朕孝伸蠲獲瑞接虹流卿等集朱紫於周行達緇黃之善頌名薰有賜神筴斯增今差某官賜卿等香想宜知悉

賜樞密院官滿散天申節道場香口宣

令行九夏節紀千秋有若樞機之賢式嚴蓬貝之祝芬香是錫福祉斯迎

賜殿前司滿散天申節道場香口宣

六幕迎薰千齡紀節有若羽林之將載嚴貝葉之宮錫
爾寶芬助予孝治

賜皇子鄧王慶王恭王滿散天申節道場香口

宣

王卮講家人之禮金簡受仙官之祥惟時王邸之賢能
盡孫枝之孝寶薰是錫壽祉斯崇

撫問賀允中到闕并賜銀合茶藥口宣

卿驅馳道路密通郊關迺將恩籩之頒往問行驂之次
用申眷待益輔葆調

賜趙密辭免少保不允批答口宣

卿枕戈之久解紱而歸已出褒章用光晚節撫文可畧
拜命勿遲

賜少保致仕趙密告口宣

卿懇辭宦路歸憩家園緬懷百戰之勞已陟三孤之貴
出綸有賜永命為榮

賜賀允中辭免同知樞密院事斷來章批答口

宣

載稽夙望誕布明綸升筦斗樞茂經天緯興情相慶冲
節可蠲

賜湯思退口宣

卿鼎席望尊籌帷慮審不改變調之職俾專總統之權
已告昕庭宜祗茂渥

賜楊存中辭免同都督斷來章批答口宣

朕疇咨良帥共督諸軍庶有橐弓之期遂臻奠枕之治
往圖偉績勿事撓辭

賜皇子鄧王慶王恭王滿散會慶節道場香口
宣

卿竭孝蘭陔歸誠蓮刹介八千春之眉壽繙十二部之
尊經爰賜寶芬益嚴勝會

賜三省官滿散會慶節道場香口宣

卿等輸忠衛戟展敬名藍欲崇箕翼之符廣集乾坤之

祉迺加頒錫以助薰嚴

賜樞密院官滿散會慶節道場香口宣

卿久問兵甲來歸廟堂次舍之間神明所護宜有恩頒之寵以咨偃薄之勞

賜趙密落致仕權殿前司職事告口宣

朕疇咨一老復衛千廬士氣既增輿言咸愜宜祇綸命庸副眷懷

賜王之望辭免參知政事斷來章批答口宣

卿學擅洽聞材堪大任茲陟鈞衡之貳甚諧中外之瞻
宜視批章遂蠲來牘

郊祀畢宣勞將士口宣

朕修報觚壇迎釐齋幄衛社賴六師之武周廬閱三宿
之勞式對嚴凝良深嘉獎

撫問少保恩平郡王璩到闕并賜銀合茶藥口
宣

卿比趨召節來相郊裡蒙冒霜威馳驅江路庸推頒式

以示眷私

傳宣撫問宣押陳康伯赴行在口宣

朕焦勞宵旰注想儀刑申遣使璫往迎召驛所期倍道以副虛懷

賜湯思退提舉太平興國宮告口宣

卿游騰需牘祈解冢司載嘉勇退之風莫遂挽留之意茲頒制渥宜體睠懷

賜楊存中都督江淮軍馬告口宣

邊塵方起閫制匪輕賴總督之得人能掃除而安國已
頒褒律宜服渙恩

撫問張綱到闕并賜銀合茶藥口宣

卿虔趨一節密次九閫宜飭使貂往詢來驛恩頒有式
眷倚惟深

撫問陳康伯到闕并賜銀合茶藥口宣

卿不憚三冬載馳千里副吾論相之意知汝致君之忠
宜有恩頒用申眷遇

賜錢端禮辭免簽書樞密院兼提舉德壽宮
斷來章批答口宣

比稽輿論俾陟宥廷仰以奉於慈闈遠欲清於邊祲宜
祇茂命勿治撫章

賜虞允文辭免同簽書樞密院事斷來章批答
口宣

朕延登邦傑進列機廷所賴遠謀以排外侮宜肩忠報
勿治撫詞

賜陳康伯告口宣

朕眷求元老復位上台興望迫歸邊氛自卻宜膺書贊
以展經綸

宣押陳康伯赴都堂治事口宣

朕延想柱石有如渴飢行旆非遙我心則喜申戒貂璫
之使趣臨政事之堂勿復趑趄用酬眷倚

賜陳康伯批答口宣

卿跋履川谷肯為朕來整頓乾坤誰出卿右其展經綸

之蘊勿修撫避之文

撫問楊存中賜金合茶藥口宣

卿久督戎旃茲周歲籥念風威之偃薄知幕府之勤勞
爰出恩頒用資嗇護

撫問諸大帥并賜鞍馬口宣

歲律將更邊城良苦分禁閑之上駟助戎幕之神旗祇
服恩頒益思忠報

賜錢端禮斷來章批答口宣

卿望高兩地象應三階掌朝政於中臺本兵權於西府
當酬眷倚毋守謙撝

賜虞允文斷來章批答口宣

卿學蓋尊王材堪謀國進躋樞貳益起巖瞻宜體批章
遂蠲冲牘

賜王剛中斷來章批答口宣

比采師言俾登宥地乾綱獨斷渙命已行當諒至懷勿
拘遜禮

賜蒲察久安告口宣

卿比逢郊類獲相盛儀厥有明綸用敷祭澤往其祇服
思稱龍光

賜吳璘告口宣

卿擁旄乘塞卓馬造朝爰舉徽章用頒褒律亟其祇服
式副倚毗

賜吳璘辭免太傅新安郡王不允斷來章批答
口宣

朕涓辰之吉數命於庭褒答元勲諧契輿論其祇茂渥
遂寢撫文

賜王彥加恩告口宣

朕比講郊裡普推祭福若時號將宜出綸言用示眷懷
亟其祇服

賜三省官滿散天申聖節道場香口宣

卿等萃千官於仁宇祈萬壽於慈庭以若忠勤深深嘉
尚名薰之賜法會是崇

賜三衙滿散天申聖節道場香口宣

卿等庀職周廬輸忠報上開梵宮之法席祝慈殿之遐齡爰錫寶薰用嚴勝會

郊祀畢端誠殿受賀樞密宣答宰臣詞

有制朕惕奉慈謀肇禋吉土賴上台之顯相協吉日以涓成翕受厖禧言旋清蹕禮成之慶與卿等同之

端誠殿宣答樞密詞

朕黃流假廟紫燎充壇惟元祀之熙成賴鴻樞之陪輔

端誠殿宣答筦軍詞

朕嗣守邦圖初修郊類賴爾干戈之衛肅無陞極之譁
已受神釐遂迴詔蹕

麗正門肆赦宣答宰臣詞

燔柴泰時接風馬之靈旂旅軫端闡霈星難之渥澤敷
錫之慶與卿等同之

賜四川宣撫使吳璘夏藥勅書

五月
四日

勅吳璘卿權尊帥閫威震坤維當鑠石流金之時勞鋟

甲摩劒之事速頒珍劑庸示睦懷今賜卿銀合夏藥并
統制統領將佐官屬並依年例分賜仍傳宣撫問故茲
示諭想宜知悉夏熟卿等各比好否遣書指不多及

賜保信軍官吏軍民僧道耆壽等示諭勅書

勅保信軍官吏軍民僧道耆壽等朕以張浚宣力於外
閱時茲多眷惟耆哲之臣閱勞軍旅之事趣來歸而調
變迺懇請於退休已疏異等之恩特寵三孤之上相攸
樂土畀以節旄諒草木之知名必室家之相慶今特授

張浚少師保信軍節度使判福州依前魏國公加食邑一千戶食邑實封四百戶故茲示諭想宜知悉夏熟汝等各比好否遣書指不多及

賜南平王李天祚歷日勅書

朕欽天治歷稽古頒常仰齊七政之文用協九疇之敘
瞻言南服夙慕華風欲知來歲之宜當講新書之錫諒
循月令以格時和

回賜南平王李天祚勅書

卿奉藩丹徼慕義清朝拜覃渥之褒綸馳方輸之珍物
備殫忠恪深用歎嘉

賜階文龍州經畧使吳拱等夏藥勅書

卿蒙犯隆暑勤勞極邊城池斯固於金湯介胄或生於
蟻虱匪頒有式注想不忘

賜湖北京西路制置使虞允文淮東西路宣諭
使錢端禮王之望夏藥勅書

卿潛筭折衝皇華護塞寬吾旰食勞汝暑行迺頒賜式

之珍以助生經之衛

賜福建路安撫使張浚夏藥勅書

卿甫離揆路借重价藩當炎赫之御辰恐驅馳而失敘
迺分良劑用輔生經

賜荆湖南路安撫使黃祖舜夏藥勅書

卿在時舊德為國長城當三夏之炎暉念重湖之卑濕
爰舉匪頒之式庶迎善耆之休

賜江東安撫使汪澈銀合臘藥勅書

卿遠擁帥牙時當寒齋雖有神明之相豈無偃薄之勞
爰出恩頒用資順耄

賜江東安撫使汪澈銀合夏藥勅書

卿譽偃朝紳權尊宮籥茲履長羸之序恐違耆養之宜
爰錫上食用頒溫檢

賜御前都統制郭振等銀合夏藥勅書

卿權尊制閫任重干城式當炎燠之辰或有晦明之疾
宜頒良劑用表眷懷

賜四川制置使汪應辰銀合夏藥勅書

卿遠開幕府靜鎮坤維聿臨九夏之時宜有萬金之劑
爰推賜式用示眷懷

賜吳璘夏藥勅書

薰風入律畏日流金豈無霑汗之勞宜有衛生之助庸
頒珍劑以表眷懷

盤洲文集卷十六

欽定四庫全書

盤洲文集卷十七

宋 洪适 撰

內制七

太一宮介福殿開啓太上皇帝本命道場青詞
維年月朔日嗣天子臣某恭遇光堯壽聖太上皇帝本
命之辰謹遣某官命道士二十一人於太一宮介福殿
開啓靈寶道場一晝夜滿散設醮一百二十分位點上

生命燈一壇謹上啓聖位伏以風薰紀序迓慈闈元命
之辰星度垂光崇睿筭長生之祉飈輪在上藥笈具陳
庶通格帝之誠獲盡事親之孝臣無任

太一宮齊明殿開啓天申節道場青詞

伏以仰東井之躔斯臨永晝竭南陔之養更慶誕辰虔
叩層穹肅陳法席所冀博臨之況益崇難老之祥

萬壽觀純福殿開啓天申節道場青詞

伏以電樞稽瑞垂金鑑於千秋雲陸臚驪上玉卮之萬

壽寶壇夙啓秘笈屢緒更迎滋至之休永介無疆之祉

南郊奏告天慶觀報恩光孝觀青詞

伏以燭泰時之柴將迎長至降昕庭之札已肅前期仰
覬博臨助成昭報

南郊奏告元天大聖后青詞

伏以事先稽古禮大報天將陟頌祇之堂初歛棲真之
宇乞靈藥御集祉觚壇

郊祀奏告天慶觀青詞

伏以祓神丘而稱祀將講盛儀歟琳宇以告期仰徽嘉
貺惟乾坤之所助幸雨雪之不逢虔布忱衷覲竣熙事

太一宮郊祀預告祈晴青詞

伏以先唐假廟將嚴薦裸之儀萬衛適郊遂展燎熏之
報仰覲神明之祐俾無雨雪之虞淵鑒不違禮容斯備
太一宮郊祀前七日預祈晴霽青詞

伏以卜獻歲之上辛逢元日之吉亥始嚴廟裸遂舉郊
柴仰覲乾坤之休俾無風雨之阻

太一宮郊祀畢謝晴青詞

伏以卜辛日而用郊陟午階而奠幣神明所相雨雪不
逢既竣事以迎釐敢儲精而拜祝

萬壽觀純福殿開啓太上皇帝丁亥本命道場
青詞

伏以慈宮增德沓迎神策之休商律題期旋次命元之
紀虔遵冲式誕啓清壇仰徽金簡之光長上玉卮之壽
太一宮介福殿太上皇帝丁亥本命道場青詞

伏以葭律吹灰初屆清商之候萱階視蔭斯推始命之
辰仰淵覆之無私為慈庭而有禱庶迎帝祉式介皇齡
太一宮齊明殿開啓壽聖太上皇后生辰道場

青詞

伏以日臨西陸澄景多休天佑南陔純坤有慶肅延真
御前祓祕庭仰繫覆燾之仁丕錫熾昌之福

萬壽觀純福殿開啓太上皇帝丁亥本命道場

青詞

伏以天運無窮臨旻秋之季月日躔有次慶基命之元
辰延飛馭於蒼圓介壽祺于慈殿仰邀靈貺永祚昌圖
太一宮介福殿開啓太上皇帝丁亥本命道場

青詞

伏以氣動潛葭換杪秋之懿律慶流慈宸推正命之休
辰載被邃庭聿陳馨醑仰導信基之福益增神策之符
茅山崇禧觀啓建會慶節道場青詞

伏以日臨析木之津聿逢誕序天闢三茅之洞爰啓清

壇仰延臚御之光具繹琅函之祕庶臻保佑永錫熾昌
萬壽觀純福殿滿散會慶節道場青詞

伏以良月就盈斯逢誕序上天佑德已錫蕃釐法會備
成真科有考更賴照臨之施咸躋仁壽之隆

太一宮崇禧殿滿散會慶節祝太上皇帝太上
皇后聖壽道場青詞

伏以肇寒律于三冬聿臨初度祝慈庭之萬壽仰叩上
圓願迎藥笈之休式展蘭陔之報

太一宮介福殿開啓太上皇帝丁亥本命道場
青詞

伏以天象蓋高神心善應屈慈庭之元命啓祕宇之清
壇仰祈顧諟之私增昇熾昌之福

萬壽觀純福殿開啓天申節道場青詞

伏以伯趙司至氣和吹律之中華渚流虹節紀稱觴之
次夙陳法席仰介慈齡更迎覆育之休永錫壽域之祉
太一宮為民間疫癘祈禱道場青詞

伏以高高在上丕冒綿區林林而羣仰依洪造茲履炎
歎之序尚多疵癘之人爰被靈壇大開醮席敢覲甄陶
之施咸收藥石之功

滿散青詞

伏以天降之災或爽雨暘之候民殃於疫遂多哭泣之
聲茲啓清場已周法會仰祈慈覆益賜嘉生

太一宮滿散會慶節祝太上皇帝太上皇后聖
壽道場朱表

伏以壇間靖館儀訖沖科虔布誠心幾九閭之格帝永
伸孝養以四海而奉親

郊祀奏告天慶觀滿散朱表

伏以律對黃鍾

續改作節
近青遠

報伸紫峙肅清場而先告秩

元祀以非遙仰集美光慶成鉅典

太一宮滿散天申節道場朱表

伏以儀備清壇福徼寶笈復投誠于淵覆願介壽于慈
宮永庇羣編丕隆洪祚

萬壽觀滿散太上皇帝本命道場朱表

伏以祕館敷筵肅挹飈旂之馭僊科考式具緒寶積之
文仰賴天休常共子職

太一宮滿散太上皇帝本命道場朱表

伏以展儀祕殿訖事清場惟悃恤之上通斯高明之俯
格式資道妙永錫慈休

太一宮滿散太上皇后本命道場朱表

伏以裒黃冠之衆志瞻紫極之榮光迎此神釐歸諸慈

壺永對九秋之籥共尊萬壽之觴

萬壽觀滿散太上皇帝本命道場朱表

伏以僊科如式寶笈終篇名薰縹緲以紫風列炬熒煌而奪月集殊休于法會隆曼壽于親庭

太一宮滿散太上皇帝本命道場朱表

伏以按琅笈之靈科飈存來下企珠躔之景緯夜漏已深寶供備成修齡永錫

崇禧觀滿散會慶節道場朱表

伏以祓寶席于名山飛密章于穹漢用導麗鴻之祉式
光震誕之期法會備成皇休茂對

萬壽觀滿散會慶節道場朱表

伏以寶壇閱月具按冲科菲德動天密迎純嘏更冀無
私之覆益宏有截之休

太一宮滿散太上皇帝本命道場朱表

伏以祓清秘宇披考真科期帝鑒之不違致皇齡之有
衍永依慈寶共庇涵生

萬壽觀滿散天申節道場朱表

伏以協華系統誕聖紀期清場仰接於飈旂沖式已周
於月律茲罄再三之祝願臻億萬之祥

太一宮滿散太上皇帝本命道場朱表

伏以冬灰欲半夕漏甫中具閱靈篇已修馨供仰徹天
祐永相親闡

太一宮滿散預告郊祀祈晴朱表

伏以虔被清場具遵洞式敢期默相賜以時暘仰瞻明

概之祥獲受宴娛之祉

萬壽觀滿散天申節道場朱表

伏以儀肅清壇福種慈殿已匝三旬之式益崇萬壽之
祈淵鑑弗違慶圖有賴

太一宮滿散郊祀畢謝晴道場朱表

伏以寶壇肅啓法會崇成大哉覆燾之私有此清明之
賜式迎景貺用庇函生

太一宮滿散為民祈禱道場朱表

伏以就涓基宇備考仙科薰修已閱於半旬康樂浸綿
於萬井更徼鴻祐盡掃積疴

皇帝賀壽聖太上皇后生辰表文

伏以清商叶序燦南極之瑞星沙麓發祥紀東朝之誕
節騰懽宮壺降嘏霄垠

中謝

恭惟德厚儀坤明遵邇日

葛之覃兮于中谷久播徽音夏之興也以塗山特書彤
史六珈偕老萬壽維祺臣仰奉慈顏欣逢令旦披圖按
牒觀芝莖十二之華設席肆筵上椿歲八十之頌

皇后賀郊祀禮成表文

伏以禮講泰垓秩百神而受職澤流端闕斂五福以錫
民熙事崇成羣倫胥慶恭惟重華協帝下武繼文肇郊
旅而分年偶邊虞而遷日避新陽之近晦蓋遵藝祖之
規卜嗣歲而用辛遂踵太宗之制况值三朝之始益來
四表之驩妾仰儷乾明猥居坤極際鴻儀之獲考集彙
抱以交忻

閏十一月起居攢宮諸帝旦表文

伏以柔荔迎時甫踐長於信宿中榆立閔茲告朔之休
辰共惟道邁百王德齊七政扇皇風於有截綿寶歷于
無疆式展孝思敢恭明薦

諸后旦表文

伏以葭吹六琯甫過書雲斗指兩辰斯為附月恭惟道
光坤則德儷乾儀齊太如之徽音嗣塗山之逸響敢虔
芳薦式罄時思

諸帝望表文

伏以置閏嚴冬歸餘暢月風力已侵于獸炭霜威頗犯
于狐裘恭惟累洽重熙同條共貫紀無前之偉績垂不
拔之元基惕奉燕謀敢陳嘉獻

諸后望表文

伏以寒籥過中斯遇歸奇之象素輪既望載深追遠之
情恭惟沙麓垂光河雎協詠配紫宸之聖德播彤管之
芳塵式想柔儀竚增孝慕

永祐陵攢宮翻瓦抽換殿柱等畢工告遷徽宗

皇帝神御還殿奉安表文

臣伏以恭繕寢園載新楹桷嚴風興之香火奉月出之衣冠爰諏吉以寧神冀發祥而燾後

奉告昭慈聖獻顯恭顯肅顯仁懿節皇后表文
伏以土木訖功棟梁除舊企仙園而在望奉大練以來
娛仰迪燕寧敢伸潔告

郊祀畢奏謝聖祖及上帝表文

伏以始登紫時大報蒼圓奏六變之音率循禋典謹一

純之薦丕講彌文慶熙事之涓成按沖科而拜貺

郊祀畢奏謝諸宮觀帝后表文

伏以慈庭詒燕泰峙肇禋用日之辛蓋襲卜郊之制事
天靡闕遠超絕野之儀鴻祀既成先猷所相敢伸昭報
永迪孚休

南郊奏告諸陵并攢宮表文

伏以氣迓黃宮禮行泰峙有覲協華之德初修報本之
祠顧瞻威神徼求保佑



盤洲文集卷十七